

**AKASHVANI AIZAWL
REGIONAL NEWS BULLETIN**

Date – 01/02/2026

Time - 18:30 Hrs

HEADLINES (EVENING)

1. Union Finance Minister, Nirmala Sitharaman-in Kum 2026-27 atana sorkar laipui sum ruahman, Union Budget, Lok Sabha-ah a pharh.
2. Tangka kum tharah central sorkar atanga Mizoram sum hmuh tur a pung dawn.
3. Tun thla ni 17 atanga tan tur Assembly inkhawm atan bill a la lut lova House chhunga lehkhah pharh tur 2 leh zawhna engemawzat a lut tawh.
4. Mizo Juda ti a sawi, Bnei Menashe ti a invuah mi 300 vel chu tun thla chhung a Israel rama pem thla turin an inbuatsaih mek.

<><><>

FM PRESENTS UNION BUDGET 2026-2027

Kum 2026-27 atana sorkar laipui sum ruahman, Union Budget chu vawiin khan Union Finance Minister, Nirmala Sitharaman-in Lok Sabha-ah a pharh a, Budget, a zawna vawi 9 a pharhna a ni.

Finance Minister chuan Budget chu thalaite tihchakna tur budget nia sawiin budget chu mawhphurhna chi 3 behchhana duan a ni, a ti a, ei leh bar lama chak zawka hmasawna turte, mipui hmasawna tur leh chhungkua, hnam leh bial tinte hnena an mamawh pek leh an dinchhuahna tur ruahmannate a tel a ni, a ti.

Budget-ah hian khadi, handloom leh handicraft tihchakna tur Mahatma Gandhi Gram Swaraj kalpuina turte, Textile Sector tana National Fibre Scheme leh National Handloom & Handicraft te thuikhawmtu tur, Integrated Programme hnuaiia Mega Textile Park din tura rawtna te a tel a, National Institute of Pharmaceutical Education & Research thar 3 dinna tur leh institute awm sa 7 thuum thatna tur a tel bawk.

Budget tharah hian cancer natna veite enkawlna damdawi chi hrang hrang 17-ah chhiah tih bo a ni a, ramdang atanga damdawia inenkawl duhte an pun chhoh theih nan Regional Medical Hub 5 din a ni dawn a, All India Institutes of Ayurveda thar 3 din tum a ni bawk. Arunachal Pradesh, Sikkim, Assam, Manipur, Mizoram leh Tripura-ah Buddhist Circuit tihmasawna tur scheme kalpui tum a ni a, Tezpur leh Ranchi-a rilru lama harsatna neite enkawlna hmun, National Mental Health Institute-te chu Regional Apex Institution dinhmuna hlangkai turin thuum that tum a ni bawk.

<><><>

UNION BUDGET FOR MIZORAM

Tangka kum tharah central sorkar atanga Mizoram sum hmuh tur a pung dawn.

Vawiina Union Finance Minister Nirmala Sitharaman-i'n Union Budget a pharh takah chuan tun tangka kum kal lai (2025-2026) a Mizoramin sum a hmuh atanga chhuta tangka kum thar tur (2026-2027)-a central sorkar atanga sum a hmuh tur chu za zela 23 point 59 a pung tura chhut a ni a. Hei hi Finance Commission 16-na-in central sorkar leh state sorkar sum insem dan tura state-te'n za zela 41 an chan tur anga chhut a ni.

Mizoram hian central sorkarin chhiah chi hrang hrang atanga sum a dawn chu tun tangka kum kal lai-ah hian cheng vaibelchhe 6,964 leh nuai 85 a ni a. Finance Minister thusawi atanga a lan dan chuan tangka kum tharah hian Mizoram chuan cheng vaibelchhe 8,608 leh nuai 8 dawng tura chhut a ni a, a punna hi cheng vaibelchhe 1,643 leh nuai 23 ni tura ngaih a ni. Hei hian tun thla a Finance changtu Chief Minister Pu Lalduhoma'n assembly a a pharh tur tangka kum thara Mizoram budget pawh a tha zawnga nghawng lian tham a neih beisei a ni.

Hemi chungchang ah hian Economics lam mithiam Pu Huna Kawlvawm chuan Mizoram Sorkar tan thil tha tak a rawn thlen ngei dawn tih a Chiang, tih sawiin ,

Mizoram tana chhinchhiah tlak tak Union Tax and Duties, India ram pumpui chhiah khawn-ah 15th Finance Commission in 0.500 a pek thin chu 16th Finance Commission -ah hian 0.564 in Mizoram chanvo a rawn tipung ati a, hmarchhak State zingah Mizoram leh Assam chiah hi 15th Finance Commission aia 16th-a Central-a chhiah tlingkhawm chang tam tur zingah an tel tih a sawi a ni.

<><><>

LADC AUSTERITY MEASURES

Nikum chawhnu lama Lai Autonomous District Council (LADC) hnuai a muster roll lak zawng zawngte chu vawiin atang hian chawlhvir vek an ni dawn.

LADC a sum leh pai dinhmun vawnga viltu 'Finance Department' in a zirchianna leh a rawtna angin LADC ah sum dehchhuah (Revenue inflow) leh senral inbuk tawklo avangin kawng hrang hrangin inremchen a tul thu tarlan a ni a. He mi vang hian nikum September ni 1 atanga December ni 11 inkara Muster Roll a hna lak zawng zawngte chu, vawiin February ni 1 atangin chawlhvir vek an nih tur thu LADC Executive Secretary thupek chuan a tarlang. Tun tum LADC inkhawmah khan sorkarna chelh hlim leh eptu lam hruaituten inrenchem pawimawhzia leh council inrelbawlna atana sum hmuh belh pawimawhzia uar takin an sawi chhuak hlawm a. Tun dinhmunah council hnuai a hnathawk an tam hle tihte sawi chhuakin hnathawkte hlawh atan sum a kal tam avangin hmasawna hnathawhna tur sum a awm mang lo an ti a. Sorkar thar chuan huai taka thutlukna a siam ngam tul an tih thute an sawi bawka a ni.

Autonomous district council 3-ah te hian council hnuai a thawk leh council budget atanga hlawh la hi an tam hle ni a sawi a ni a. Rorellai party-in vote zawna leh insawhnghehna atan an hmang thin ni a puh an ni bawka. Thenkhat sawi dan chuan council hnuai a hnathawkte hian pisa kai kim se la thutna an nei lovang tih an sawi a, hlawh hi council sum ei hektu ber niin council thenkhatah chuan budget pumpui za zela 90 chuang hlawh atana sen a nih thu an sawi a ni.

<><><>

WAR AGAINST DRUGS

Central YMA President Pu R. Lalngheeta'n Aizawl khawpui chu Zone 10-ah thenin ruihhlo do beihpui thlak a ni dawn tih a sawi.

He thu hi Aizawl Tlangnuam Branch YMA Ruihhlo Do kum puan hawna-ah sawiin, Branch tina kumpuan te pawh do hneh ngei a nih theih na'n kut a fai tur a ni ati a, Pathian malsawm tlaka fimkhur taka thawh a tul takzet tih sawiin , kohhran tinin ruihhlo a rem theih nan bang lova tawngtai theuh turin a ngen a ni. Mahni khawtlanga ruihhlo la ti lo te chu fuih sauh sauh a, a ti tawh te'n ngei an harsatzia an Chiang a, a ti lo te hi an rilru hneh turin tan lak a tul tak meuh meuh tih a sawi bawka. CYMA President chuan tunhmain Proxyvon a hluar a, hruaitu hmasate'n theihtawp chhuahin an do a, hnehin a awm tawh ati a, hun a lo kal zel a, heroin chu mi hausa faten an ching a, a lar zual leh a. Tunah chuan rampumah a lo darh ta a, nu leh pa tirumtu, chhungkua tichhe tu, mirethei fate thlengin an 'addict' ta zel chu a rapthlak lutuk a, beng sika thapui thawha hma lak a ÷ul tawh takzet ani ati a, YMA member kalkhawm te chu tihtakzeta ruihhlo do kawnga ÷an la thar leh turin a fuih a ni.

<><><>

ASSEMBLY SESSION

Tun thla ni 17 atanga tan tur Assembly inkhawm atan bill a la lut lova House chhunga lehkhapharh tur 2 leh zawhna engemawzat a lut tawh.

Assembly Secretariat atanga thu dawn danin zawhna hi House chhunga chhan chi (starred question) 445 a lut tawh a, ziaka chhan chi (unstarred question) 193 a lut tawh bawka. House dawhkana sorkar lehkhaphawimawh dah (laying of papers) tur 2 lut tawhin sorkar atangin dan thar emaw dan dinglai siamthat tur emaw lut a la awm lo ani. Assembly Budget Session lo awm tur hun hman dan tur duangtu tur Speaker Pu Lalbiakzama kaih hruai Business Advisory Committee (BAC) chu January ni 28 khan thukhawm tura ruahman a ni na-in member, legislature party hruaitu hrang hrangte Aizawl a an awm remchan loh avangin an thu thei ta lova. Chuvangin BAC thutkhawm hun tur hi tunkar Ningani (February ni 5) ruahman leh a ni.

Assembly inkhawmah chuan budget session hian hun a duh rei ber ziah a, hei hi tihtur pangngai bakah a tlangpui a budget sawihona (general discussion on the budget) bakah Minister-te'n an department chanpual a sum hman tur sawiho (demand-wise discussion) a awm bawk avang a ni a. Sorkar bill a tam leh tlemin a rei zawng tur a hril thui hle bawk a ni.

<><><>

MIZO JEWS

Mizo Juda ti a sawi, Bnei Menashe ti a invuah mi 300 vel chu tun thla chhunga Israel rama pem thla turin an inbuatsaih mek.

Aizawl a Bnei Menashe hruaitute'n an sawi danin Mizoram leh Manipur atangin mi 300 ve ve Israel-a pem thla turin an inpuahchah mek a, tun thla chawhnu lamah chuan India chhuahsan thei turah an inggai ani. Ram Thianghlim a pem thla turte hi nikum December thla bul lam khan thlan an ni a, tunge pem tur tih chiah erawh chu hriat a la ni lova. Pem thei turte thlang tur hian Juda Rabbi 9 tiamin Jewish Agency for Israel mite leh Delhi a Israel Embassy atangin mi 35 vel Aizawlah ni 10 chhung an rawn cham a, pem thlak duhte chu an hma-ah hian an inlan a ni. Bnei Menashe hruaitute chuan pem thla tura thlan ture chu Bnei Menashe member a inziaklut, mipa an nih chuan serh tan tawh leh Juda sakhua a inlet tawh an nih bakah Juda sakhaw serh leh sang an hriat thuk zawngte nen enfiah an ni a. Israel an thlen thlak tirh atanga chhuta thla 6 nung Passport neih a ngaih bakah Kristian an lo la ni ru reng em tihte pawh chik taka zir chian a ni a. Mizo Juda nihna a Israel rama lo pem tawh chhungte chu duhsak bik an nih tur thu an sawi bawk a ni.

Israel sorkar chuan tun hnai khan India ram hmarchhak, Mizoram leh Manipur a Mizo Juda mite, an rama pem thla duh mi 6,000 thelh chu kum 2030 ral hma a pem thlak a phalsak a. A tahtawla an pem thlakna turah tun thla hian a hlawm hmasa ber, mi 300 ve ve chu Mizoram leh Manipur atanga chhuk turin ruahmanna siam a ni a. Kal tur thlan chhuahte hi Rabbi-te hian an rawn puan thuai rin a nih thu Bnei Menashe hruaitu Jeremiah L. Hnamte chuan Akashvani News Aizawl a hrilh ani.

<><><>

ARMY HAWALDAR ARRESTED

Jharkhand-ah CBI-in thamna sum cheng sing 5 la tu, Ranchi-a sipai hawaldar pakhat leh civil mi pakhat an man. Hawaldar hian sipai ram nia sawi chhungah thil sak hna thawh phal sakin hemi atan hian cheng nuai 5 phut-a puh a ni a, pawisa hi a then chu a dawng tawh a ni. Hemi chungchangah hian thamna pe-tu hian lungawilohna a thlen hnu-ah CBI chuan thang kamin thamna sum a dawng lai tak chu an man ta a, he thil hi chhui zui zel a ni.

<><><>

LATVIA HIT WITH COLD SPELL

Thlasik khaw vawt na takin Latvia ram a tuam mek a, nimin khan khaw vawh lam hi Celcius degree -32 a ni a, kum 12 chhunga a vawh ber tum a ni. Latvia ramchhung hmun tam berah chuan khaw vawh lam hi celcius degree -16 atanga -26 inkar a ni deuh reng a, a vawh loh berna, Kolka-ah chuan -7 a ni.

Latvia Fire & Rescue Service leh Emergency Medical Service-te chuan intihlumna hmanruate, fimkhur taka hman turin ram mipuite an chah a, anmahni leh midang himna ngaihtuah chungchanga intihlumna hmanruate hman turin an ngen a ni.

<><><>